

白香山詩集

冊三

白香山集

白香山詩長慶集卷第一

古歎汪

立名

西亭

編訂

諷諭一

古調詩五言
凡六十四首

賀雨

皇帝嗣寶曆元和三年冬自冬及春暮不雨旱熾熾上心念下民懼
歲成災凶遂下罪己詔殷勤制一作告萬邦帝曰予一人繼天承祖宗

憂勤不遑寧夙夜心忡忡元年誅劉闢一舉靖巴邛二年戮李錡不

戰安江東顧惟眇眇德遽有巍巍功或者天降沴無乃儆予躬上思

答天戒下思致時邕莫如率其身慈和與儉恭乃命罷進獻乃命賑

飢窮宥死降五刑已責

按已責乃用左傳晉悼公已責事
謂止逋債也今本皆作責已誤

寬三農宮

女出宣徽廐馬減飛龍庶政靡不舉皆由自宸衷奔騰道路人偃僂

田野翁歡呼相告報感泣涕沾曾順人人心悅先天天意從詔下纔

七日和氣生冲融凝爲油油

一作悠悠

雲散作習習風晝夜三日雨淒淒

復濛濛萬心春熙熙百穀青芄芃人變愁爲喜歲易儉爲豐乃知王者心憂樂與衆同皇天與后土所感無不通冠珮何鏘鏘將相及王公蹈舞呼萬歲列賀明庭中小臣誠愚陋職忝金鑾宮稽首再三拜一言獻天聰君以明爲聖臣以直爲忠敢賀有其始亦願有其終

立名按元和四年閏三月憲宗以久旱欲降德音公見詔節未詳卽建言乞免江淮兩賦以救流瘠且多出宮人上悉從之制下而兩公集中有奏請加德音中節月二狀

讀張籍古樂府

張君何爲者業文三十春尤工樂府詩舉代少其倫爲詩意如何六義互鋪陳風雅比興外未嘗著空文讀君學仙詩可諷放佚君讀君董公詩可誨貪暴臣讀君商女詩可感悍婦仁讀君勤齊詩可勸薄夫敦上可裨教化舒之濟萬民下可理情性卷之善一身始從青衿歲迨此白髮新日夜秉筆吟心苦力亦勤時無采詩官委棄如泥塵恐君百歲後滅沒人不聞願藏中祕書百代不湮淪願播內樂府時

得聞至尊言者志之苗行者文之根所以讀君詩亦知君爲人如何
欲五十官小身賤貧病眼街西住無人行到門

哭孔戡

洛陽誰不死戡死聞長安我是知戡者聞之涕泣然戡佐山東軍非
義不可干拂衣向西來其道直如絃從事得如此人人以爲難人言
明明代合置在朝端或望居諫司有事戡必言或望居憲府有邪戡
必彈惜哉兩不諧沒齒爲閒官竟不得一日謇謇立君前形骸隨衆
人斂葬北邙山平生剛腸內直氣歸其間賢者爲生民生死懸在天
謂天不愛人胡爲生其賢爲天果愛民胡爲奪其年茫茫元化中誰
執如此權

立名按孔戡卽孔戣之兄也盧從史鎮澤潞辟爲書記從史寢驕
陰連王承宗田緒欲效河朔事以固位戡每秉筆至不軌之言極
諫以爲不可從史怒遂謝病歸從史復疏請貶逐憲宗不得已授
衛尉丞詔下給事中呂元膺執之上令中使慰喻元膺制書方下
戡不調而卒事
詳唐書本傳

凶宅

長安多大宅列在街西東往往朱門內房廊相對空梟鳴松桂枝狐藏蘭菊叢蒼苔黃葉地日暮多旋風前主爲將相得罪竄巴庸後主爲公卿寢疾歿其中連延四五主殃禍繼相鍾自從十年來不利主人翁風雨壞簷隙蛇鼠穿牆墉人疑不敢買日毀土木功嗟嗟俗人心甚矣其愚蒙但恐災將至不思禍所從我今題此詩欲悟迷者曾凡爲大官人年祿多高崇權重持難久位高勢易窮驕者物之盈老者數之終四者如寇盜日夜來相攻假使居吉土孰能保其躬因小以明大借家可諭邦周秦宅嶠函其宅非不同一興八百年一死望夷宮寄語家與國人凶非宅凶

夢仙

人有夢仙者夢身升上清坐乘一白鶴前引雙紅旌羽衣忽飄飄玉鸞俄錚錚半空直下視人世塵冥冥漸失鄉國處纔分山水形東海

一片白列岳五點青須臾羣仙來相引朝玉京安期羨門輩列侍如
公卿仰謁玉皇帝稽首前致誠帝言汝仙才努力勿自輕却後十五
年期汝不死庭再拜受斯言既寤喜且驚秘之不敢泄誓志居巖扃
恩愛捨骨肉飲食斷羶腥朝飧雲母散夜吸沆瀣精空山三十載日
望輜輶迎前期過已久鸞鶴無來聲齒髮日衰白耳目減聰明一朝
同物化身與糞壤并神仙信有之俗力非可營苟無金骨相不列丹
臺名徒傳辟穀法虛受燒丹經只自取勤苦百年終不成悲哉夢仙
人一夢誤一生

觀刈麥

時爲盩厔縣尉

田家少閒月五月人倍忙夜來南風起小麥覆隴黃婦姑荷簞食童
稚攜壺漿相隨餉田去丁壯在南岡足蒸暑土氣背灼炎天光力盡
不知熱但惜夏日長復有貧婦人抱子在其傍右手秉遺穗左臂懸
弊筐聽其相顧言聞者爲悲傷家田輸稅盡拾此充飢腸今我何功

德曾不事農桑吏祿三百石歲晏有餘糧念此私自媿盡日不能忘

題海圖屏風

元和己丑年作

海水無風時波濤安悠悠鱗介無小大遂性各沉浮突兀海底鼉首冠三神丘釣網不能制其來非一秋或者不量力謂茲鼉可求鼉屬牽不動綸絕沉其鈎一鼉既頓領諸鼉齊掉頭白濤與黑浪呼吸繞咽喉噴風激飛廉鼓波怒陽侯鯨鯢得其便張口欲吞舟萬里無活鱗百川多倒流遂使江漢水朝宗意亦休蒼然屏風上此畫良有由

立名按此詩於題下注年必有爲而作己丑爲元和四年四月憲宗欲乘王士真死除人代之不從則興師討之以革河北諸鎮世襲之弊裴垍不可李絳言武俊父子相承四十餘年今承宗又已總軍務一日易之恐未卽奉詔又河北諸鎮事體正同必不自安陰相黨助中尉吐突承璀欲奪垍權自請將兵討之未行九月憲宗又欲以承宗爲成德留後割其德棣二州更爲一鎮命王氏晉薛昌朝領之承宗果囚昌朝抗不奉詔遂命承璀統兵討承宗自

此兵連禍結師久無功公集有狀論其事云臣伏以河北事體本不宜用兵此詩當因是託諷也東坡云吳元濟以蔡叛犯許汝以驚東都此不可不計者也當時議者欲置之固爲非策然不得

武裴二傑士亦未易辦也白樂天豈庸人哉然其議論亦似屬置之者其詩有海圖屏風者可見其意且注云時方討淮蔡叛吾以

是知仁人君子之於兵蓋不忍輕用如此淮蔡且欲以德懷之欲
弊所持以勤無用乎悲乎此未易與俗士談也東坡此語定有爲
特借是以發之耳然今本並無淮蔡叛之注况元濟反在元和十
年縱兵侵掠不容不討者詩中不量力鼃可求等語殊不相涉是
詩之作確是元和四年然則宋本亦有
繆誤東坡以注爲据遂不復推考也

羸駿

驊騮失其主羸餓無人牧向風嘶一聲莽蒼黃河曲蹋冰水畔立臥
雪冢間宿歲暮田野空寒草不滿腹豈無市駿者盡是凡人目相馬
失於瘦遂遺千里足村中何擾擾有吏徵芻粟淪彼軍廐中化作駑
駘肉

廢琴

絲桐合爲琴中有太古聲古聲淡無味不稱今日情玉徽光彩滅朱
絃塵土生廢棄來已久遺音尙泠泠不辭爲君彈縱彈人不聽何物
使之然羌笛與秦箏

李都尉古劍

古劍寒黯黯鑄來幾千秋白光納日月紫氣排斗牛有客借一觀愛之不敢求湛然玉匣中秋水澄不流至寶有本性精剛無與儔可使寸寸折不能繞指柔願快直士心將斷佞臣頭不願報小怨夜半刺私讎勸君慎所用無作神兵羞

雲居寺孤桐

一株青玉立千葉綠雲委亭亭五丈餘高意猶未已山僧年九十清淨老不死自云手種時一顆青桐子直從萌芽拔高自毫末始四面無附枝中心有通理寄言立身者孤直當如此

京兆府新栽蓮

時爲盤屋尉趨府作

汚溝貯濁水水上葉田田我來一長歎知是東溪蓮下有清泥汚馨香無復全上有紅塵撲顏色不得鮮物性猶如此人事亦宜然託根非其所不如遭棄捐昔在溪中日花葉媚清漣今來不得地顛顚府

門前

月夜登閣避暑

旱久炎氣甚中人若燔燒清風隱何處艸樹不動搖何以避暑氣無
如出塵囂行行都門外佛閣正茗堯清涼近高生煩熱委靜銷開襟
當軒坐神泰意飄飄迴看歸路傍禾黍盡枯焦獨善誠有計將何救
旱苗

初授拾遺

奉詔登左掖束帶參朝議何言初命卑且脫風塵吏杜甫陳子昂才
名括天地當時非不遇尙無過斯位況予蹇薄者寵至不自意驚近
白日光慙非青雲器天子方從諫朝廷無忌諱豈不思匪躬適遇時
無事受命已旬月飽食隨班次諫紙忽盈箱對之終自媿

贈元稹

自我從宦遊七年在長安所得惟元九乃知定交難豈無山上苗徑
寸無歲寒豈無要津水咫尺有波瀾之子異於是久處一作要誓不諼

無波古井水有節秋竹竿一爲同心友三及芳歲闌

一作蘭花下鞍馬

遊雪中杯酒歡衡門相逢迎不具帶與冠春風日高睡秋月夜深看不爲同登科不爲同署官所合在方寸心源無異端

哭劉敦質

小樹兩株柏新土三尺墳蒼蒼白露草此地哭劉君哭君豈無辭辭云君子人如何天不弔窮悴至終身愚者多貴壽賢者獨賤迺龍亢彼無悔螻屈此不伸哭罷持此辭吾將詰義文

答友問

大圭廉不割利劍用不缺當其斬馬時良玉不如鐵置鐵在洪爐鐵消易如雪良玉同其中三日燒不熱君疑才與德詠此知優劣

雜興三首

楚王多內寵傾國選嬪妃又愛從禽樂馳騁每相隨錦鞬臂花隼羅袂控金羈遂習宮中女皆如馬上兒色禽合爲荒刑政兩已衰雲夢

春仍獵章華夜不歸東風二月天春鴈正離離美人挾銀鏑一發疊
雙飛飛鴻驚斷行斂翅避蛾眉君王顧之笑弓箭生光輝迴眸語君
曰昔聞莊王時有一愚夫人其名曰樊姬不有此遊樂三載斷鮮肥
越國政初荒越天旱不已風日燥水田水涸塵飛起國中新下令官
渠禁流水流水不入田壅入王宮裏餘波養魚鳥倒影浮樓雉澹澹
九折池縈迴十餘里四月芰荷發越王日遊嬉左右好風來香動芙
蓉蕊但愛芙蓉香又種芙蓉子不念閭門外千里稻苗死

吳王心日侈服玩盡奇瓊身臥翠羽帳手持紅玉杯冠垂明月珠帶
束通天犀行動自矜顧數步一徘徊小人知所好懷寶四方來奸邪
得藉手從此倖門開古稱國之寶穀米與賢才今看君王眼視之如
塵灰伍員諫已死浮屍去不迴姑蘇臺下艸麋鹿暗生麕

宿紫閣山北邨

晨遊紫閣峯暮宿山下邨邨老見予喜爲予開一尊舉杯未及飲暴

卒來入門紫衣挾刀斧草草十餘人奪我席上酒掣我盤中餚主人退後立斂手反如賓中庭有奇樹種來三十春主人惜不得持斧斷其根口稱采造家身屬神策軍主人慎勿語中尉正承恩

立名按貞元十二年始立左右神策護軍中尉統禁旅時竇霍權勢振赫嗣是宦官之驕橫日長公與元九書所謂聞紫閣村詩則握軍要者切齒是也宋洪景廬容齋續筆云宣和間朱勔挾花石進奉之名以固寵規利士民家一州一木稍堪翫使者即領健卒直入其家用黃封表志未即取護視微不謹則被以大不恭罪及發行必撤屋決牆而出偶讀樂天此詩乃知唐世固有是事蓋貞元元和間也和間也

讀漢書

禾黍與稂莠雨來同日滋桃李與荆棘霜降同夜萎艸木既區別榮枯那等夷茫茫天地意無乃太無私小人與君子用置各有宜奈何西漢末忠邪並信之不然盡信忠早絕邪臣窺不然盡信邪早使忠臣知優游兩不斷盛業日已衰痛矣蕭京輩終令陷禍機蕭望之京房等每讀元成紀憤憤令人悲寄言爲國者不得學天時寄言爲臣者可以

鑒於斯

贈樊著作

陽城爲諫議以正事其君其手如屈軼舉必指佞臣卒使不仁者不得秉國鈞元稹爲御史以直立其身其心如肺石動必達窮民東川八十家冤憤一言伸劉闢肆亂心殺人正紛紛其嫂曰庾氏棄絕不爲親從史萌逆節隱心潛負恩其佐曰孔戡捨去不爲賓凡此士與女其道天下聞常恐國史上但記鳳與麟賢者不爲名名彰教乃敦每惜若人輩身死名亦淪君爲著作郎職廢志空存雖有良史才直筆無所申何不自著書實錄彼善人編爲一家言以備史闕文

蜀路石婦

道傍一石婦無記復無銘傳是此鄉女爲婦孝且貞十五嫁邑人十六夫征行夫行二十載婦獨守孤煢其夫有父母老病不安寧其婦執婦道一一如禮經晨昏問起居恭順發心誠藥餌自調節膳羞必

甘馨夫行竟不歸婦德轉光明後人高其節刻石像婦形儼然整衣巾若立在閨庭似見舅姑禮如聞環珮聲至今爲婦者見此孝心生不比山頭石空有望夫名

折劍頭

拾得折劍頭不知折之由一握青蛇尾數寸碧峯頭疑是斬鯨鯢不然刺蛟虬缺落泥土中委棄無人收我有鄙介性好剛不好柔勿輕直折劍猶勝曲全鉤

登樂遊園望

獨上樂遊園四望天日曛東北何靄靄宮闕入煙雲愛此高處立忽如遺垢氛耳目暫清曠懷抱鬱不伸下視十二街綠樹間紅塵車馬徒滿眼不見心所親孔生死洛陽元九謫荆門可憐南北路高蓋者何人

酬元九對新栽竹有懷見寄

頃有贈元九詩云有節秋竹竿故元感之因重見寄

昔我十年前與君始相識曾將秋竹竿比君孤且直中心一以合外
事紛無極共保秋竹心風霜侵不得按今本作會將秋竹心風霜侵不得落去會將秋竹竿以下四
句始嫌梧桐樹秋至先改色不愛楊柳枝春來軟無力憐君別我後
見竹長相憶常欲在眼前故栽庭戶側分首今何處君南我在北吟
我贈君詩對之心惻惻

感鶴

鶴有不羣者飛飛在埜田飢不啄腐鼠渴不飲盜泉貞姿自耿介雜
鳥何翩翩同遊不同志如此十餘年一興嗜慾念遂爲矰繳牽委質
小池內爭食羣雞前不惟懷稻粱兼亦競腥羶不惟戀主人兼亦狎
烏鳶物心不可知天性有時遷一飽尚如此況乘大夫軒

春雪

元和歲在卯六年春二月月晦寒食天天陰夜飛雪連宵復竟日浩
浩殊未歇大似落鵝毛密如飄玉屑寒銷春茫蒼氣變風凜冽上林